

Sarajevo, 08.09.2020.godine

Klub zastupnika u Predstavničkom domu
Parlamenta Federacije BiH
Zastupnica Lana Prlić

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Prijmljeno: 09-09-2020

Brj. jed.	Broj	Priloga	Vrijednost
01-	02-	1539	20

ZA:
BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
PREDSTAVNIČKI DOM
n/r Predsjedavajućeg PD Parlamenta FBiHU skladu sa članom **172. Poslovnika** o radu Predstavničkog doma Parlamenta Federacije Bosne i Hercegovine, u skraćenoj parlamentarnoj proceduri podnosim:**Prijedlog****Zakona o izmjenama i dopunama Zakona o hraniteljstvu u Federaciji Bosne i Hercegovine**

Molim vas da tekst Prijedloga zakona uputite Vladi Federacije BiH radi dostavljanja mišljenja u poslovničkom roku od 30 dana.

U prilogu Vam dostavljam tekst Prijedloga zakona.

S poštovanjem,



Lana Prlić, zastupnica

BOSNA I HERCEGOVINA
FEDERACIJA BOSNE I HERCEGOVINE
PARLAMENT
PREDSTAVIČKI DOM
KLUB ZASTUPNIKA SDP BIH
ZASTUPNIK/CA

(PRIJEDLOG)

ZAKON
O IZMJENAMA I DOPUNAMA ZAKONA O HRANITELJSTVU U
FEDERACIJI BOSNE I HERCEGOVINE

Sarajevo, rujan/septembar 2020. godine

ZAKON
O IZMJENAMA I DOPUNAMA ZAKONA O HRANITELJSTVU U
FEDERACIJI BOSNE I HERCEGOVINE

Član 1.

U Zakonu o hraniteljstvu u Federaciji Bosne i Hercegovine ("Službene novine Federacije Bosne i Hercegovine", broj: 19/17) u članu 32. stav (6) iza riječi "naknadu", interpunkcijski znak zarez zamjenjuje se interpunkcijskim znakom tačka, a riječi: "pod uvjetom da između hranjenika i hranitelja ne postoji obaveza izdržavanja prema Porodičnom zakonu Federacije Bosne i Hercegovine", brišu se.

Član 2.

Ovaj Zakon stupa na snagu osmog dana od dana objavljivanja u "Službenim novinama Federacije Bosne i Hercegovine".

OBRAZLOŽENJE

I – USTAVNI OSNOV

Ustavni osnov za donošenje ovog Zakona sadržan je u odredbi člana IV A. 5. 20. 1. d. Ustava Federacije Bosne i Hercegovine kojim je propisano da je Parlament Federacije Bosne i Hercegovine nadležan za donošenje zakona o vršenju funkcija federalne vlasti.

II – RAZLOZI ZA DONOŠENJE ZAKONA

Hraniteljstvo je najbolji, najhumaniji i oblik zbrinjavanja koji korisnicima omogućava porodično okruženje. Istovremeno, to je po državu najpovoljniji način zbrinjavanja korisnika. Poređenja radi, smještaj u ustanove socijalne zaštite čiji je osnivač FBiH košta oko 1050 KM mjesečno. Istovremeno, smještaj u hraniteljsku porodicu državu košta znatno manje od smještaja u ustanovu. Poređenja radi, u Kantonu Sarajevo gdje se isplaćuju najviše naknade, mjesečna naknada hranitelju po jednom hranjeniku iznosi 172,00 KM, a naknada za izdržavanje hranjenika 304,00 KM, što ukupno iznosi 476,00 KM.

Postojeći Zakon ograničava bliskim srodnicima (nane/bake, djedovi, braća i sestre, unučad) naknadu za hranitelja, koja u slučaju Kantona Sarajevo iznosi 172,00 KM. Ograničenje se naslanja na Porodični zakon FBiH, iako znamo da postoje druge prakse poput "dodatka na djecu" gdje bliski porodični srodnici mogu primati neku vrstu naknade unatoč krvnom srodstvu.

U velikom broju slučajeva osobe koje bi željele biti hranitelji nemaju dovoljno vlastitih sredstava i ova mala naknada od 172,00 KM može činiti prevagu u odluci da li da preuzmu dijete ili osobu u hraniteljstvo ili da je prepuste smještaju u ustanovu socijalne zaštite. U praksi nalazimo nane i dede koji žive od minimalne penzije i djecu ne uzimaju u hraniteljstvo jer vjeruju da će bolje uslove imati u ustanovi.

Ovom malom zakonskom izmjenom i minimalnim izdvajanjem sredstava možemo zadržati brojne korisnike u porodičnom okruženju ili ih čak iz ustanova vratiti u porodično okruženje. Osim što je neuporedivo bolje po samog korisnika, ovo rješenje je više nego dvostruko povoljnije za državu.

Nedovoljni finansijski poticaji jedan su od razloga zašto se institut hraniteljstva i dalje slabo koristi. Poređenja radi, u susjednoj Republici Srbiji čak 90% djece bez roditeljskog staranja je smješteno u hraniteljske porodice, a ne u ustanove. Srbija hraniteljima nudi daleko povoljnije uslove koji uključuju i plaćanje penzionog osiguranja, kao i brojne dodatne naknade poput opremanja djeteta za školu, plaćanje prevoza, itd. Svjesni vlastitih kapaciteta i mogućnosti Federacije BiH i kantona, ne tražimo ovaj standard, ali tražimo ovaj minimalni i neznatni ustupak kako bi se pomoglo hraniteljima i kako bismo što više djece i odraslih korisnika smjestili u porodično okruženje.

III – OBRAZLOŽENJE PRAVNIH RJEŠENJA

Članom 1. mijenja se član 32. na način da se u stavu (6) ovog člana brišu riječi: "pod uvjetom da između hranjenika i hranitelja ne postoji obaveza izdržavanja prema Porodičnom zakonu Federacije Bosne i Hercegovine", čime se omogućava da i hranitelji koji prema Porodičnom zakonu FBiH imaju obavezu izdržavanja imaju pravo na hraniteljsku naknadu.

Članom 3. propisuje se stupanje na snagu Zakona o izmjeni Zakona o hraniteljstvu u Federaciji Bosne i Hercegovine.

IV – FINANSIJSKA SREDSTVA

Za provođenje ovog Zakona nisu potrebna dodatna sredstva u Budžetu Federacije Bosne i Hercegovine.

Za provođenje ovog Zakona potrebno je osigurati neznatna finansijska sredstva u budžetima kantona. Primjera radi, u julu 2020. godine u Kantonu Sarajevo je bilo devet hranitelja koji nisu ostvarivali pravo na naknadu za hranitelja.

O d r e d b a

Zakona o hraniteljstvu u Federaciji Bosne i Hercegovine ("Službene novine Federacije Bosne i Hercegovine", broj: 19/17) čija se izmjena predlaže

Član 32.

(Hraniteljska naknada)

- (1) Visina hraniteljske naknade ovisi o broju i vrsti smještenih hranjenika.
- (2) Osnovica za utvrđivanje iznosa hraniteljske naknade je prosječna neto-plaća isplaćena u Federaciji prema objavljenom podatku Federalnog zavoda za statistiku za prethodnu godinu.
- (3) Mjesečna naknada hranitelju po jednom hranjeniku iznosi najmanje 15% od osnovice iz stava (2) ovog člana i uvećava se za 15% za svakog narednog hranjenika.
- (4) Izuzetno od stava (3) ovog člana, mjesečna naknada hranitelju koji obavlja specijalizovano hraniteljstvo iznosi najmanje 30% od osnovice iz stava (2) ovog člana i uvećava se za 20% za svakog narednog hranjenika.

(5) Mjesečna naknada za hranitelja koji istovremeno obavlja tradicionalno i specijalizovano hraniteljstvo utvrđuje se na način da se kao polazna osnovica uzima mjesečna naknada za specijalizovano hraniteljstvo iz stava (4) ovog člana i uvećava se za 15% za hranjenika korisnika tradicionalnog hraniteljstva, odnosno za 20% za hranjenika korisnika specijalizovanog hraniteljstva.

(6) Hranitelj koji obavlja srodničko hraniteljstvo ima pravo na hraniteljsku naknadu, pod uvjetom da između hranjenika i hranitelja ne postoji obaveza izdržavanja prema Porodičnom zakonu Federacije Bosne i Hercegovine.